



24. maji 2016

UPA2016/145

Nunatta nunatut nunarsuarmioqataasutut qanoq inissisimanagera qanorlu nunani allani nunallu tamalaat akornanni sorsunnerit pisullu allat peqqutigalugit inuttut ajunaarnersuartoqartillugu Nunatta qanoq pisarnissaa, nunallu tamalaat akornanni ikiuniarnerit qimaasunillu tigusiniarnerit nunanit tamalaanit peqataaffigineqartillugit Nunatta qanoq inissisimasarnissaa pillugu Inatsisartuni oqallisissiatut siunnersuut.

(Inatsisartunut ilaasortaq Sara Olsvig, Inuit Ataqaatigiit)

Siullermik Siumumiit una qulequtaq qaqqinneqartoq nuannaarutigaarput.

Nunarsuarmioqataaneq assigiinngitsunik paasineqarsinnaasoq qularnanngilaq, Kalaallit Nunaat nunarsuarmioqataalluni assigiinngitsuni suliniutini siuttuusarpoq imaluunniit suleqataasarpoq. Aammattaaq nunarsuarmioqataavugut, nunarsuarmioqataaansinnilu ajunaarnersuaqaraangat, allatuullu nammineq ajornartorsiutinik amerlasuunik aqqitassaqaqaralualuta, qangaaniilli Kalaallit Nunaat ikiuuttarpoq.

Assersuutigalugu nunap sajunnerata pissutaanik ajunaarnersuit imaluunniit kaannersuaqaraangat, Kalaallit Nunaat arlaleriarluni aningaasanik katersuiniartarpoq. Kalaallit Nunaanni ikiuerusussuseq pigineqartoq malunnarpoq.

Oqallissaarummi siunnersuuteqartup siunertaa paasilluarparput, aamma qularnanngilaq siunissaq ungasinnerusoq isigalugu Kalaallit Nunaat qimaasunik tigusisinnaalernissaa tikikkumaaripput. Inoqammik ikiuinninneq aamma inuup nammineq nukissaqassusaa apeqqutaasoq naluneqanngilaq.

Taamaattoq aamma oqaatigisariaqarpoq nunatsinni immaqa aningaasat nassaarinissai qimaasunik tigusinissamut ajornarnaviannikkaluartoq, aamma oqaatiginngitsoortariaqanngitsoq nunatsinni atonerluinermik ajornartorsiutit ima annertutigaat, ikiuisinnaasut annertuumik killeqarlutik.

Allaammi nunatsinni illoqarfiit ilai ilinniarsimasunik inunnik isumaginninnermi sulisussaqaanngilluinnarlutik.

Aammattaaq ikiaroorartumik, imigassamik, kiisalu meeqqanik kinguaassiutitigut atorerluineq nunatsinni taama annertutigitillugu, minnerunngitsumik imminut toquttarneq, nunarsuarmi annertunerpaat ilagigaat, maannakkut suliassat ilaartorlugit, qimaasunik sullissiniarnissaq takorlooruminaappoq pittaasumik naammaginartumillu suliarineqarsinnaasoq nunatsinni.

Ilanngullugu oqaatigineqarsinnaavoq nunat tamarmik ajornartorsiuteqarput, taamaakkaluartoq qimaasunik tigooraapput, aap taamaappoq. Kisianni nunat pineqartut inunnik isumaginninnermi ajornartorsiutaat nunatsinnit annertutigisut oqaatigineqarsinnaanngilaq.

Nunatsinni assigiingittutigut atorerluinerup kingunipilui amiilaarnartut sakkortusisamik qanoq iliuseqarfiginissai Siumumiit ujartorerorusappagut.

Taamaammaat Naalackersuisooqatigiit partiivi isumaqarput maannakkuugallartoq Kalaallit Nunaat allatigut ikieuassinnaasoq. Malugalugulu maannakkuugallartoq.

Ilaatigut aningaasanik katersuiniarnikkut, kisianni aamma allatigut pisinnaaffitsigut.

Ilanngullugu, nunarsuarmioqataanitsinni suliat Naalackersuisup taakkartugai uteqqinngikkaluarlugit Kalaallit Nunaata nunarsuarmioqataaneranut takussutissaapput.

Taamatut oqaaseqarluta Inatsisartut oqaaseqaatissaattut siunnersuutigineqartoq isumaqataaffigaarput.

Qujanaq.

Jens-Erik Kirkegaard,

Siumut, Demokraatit Atassullu sinnerlugit.